

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
Tingkat 15, 16, 17 & 20, Menara Bank Rakyat Shah Alam,
Jalan Majlis, Seksyen 14,
40622 Shah Alam, Selangor Darul Ehsan

No Tel : 03-55107426
Fax : 03-55107422

KPDNHEP MULAKAN PEMERIKSAAN AUDIT DAN PEMUTIHAN DI PREMIS PEMBUNGKUSAN MINYAK MASAK BERSUBSIDI

SHAH ALAM, 5 Julai 2022 – Kementerian Perdagangan Dalam Negeri dan Hal Ehwal Pengguna (KPDNHEP) hari ini turun padang menjalankan pemeriksaan secara bersasar di premis pembungkusan minyak masak bersubsidi utama di sekitar Shah Alam, Selangor.

2. Pemeriksaan ini diketuai sendiri oleh YB Dato' Rosol bin Wahid, Timbalan Menteri Perdagangan Dalam Negeri dan Hal Ehwal Pengguna dan turut disertai Tuan Shahrudin bin Hamzah, Ketua Seksyen Bekalan Bahagian Penguat Kuasa KPDNHEP; Tuan Mohd Khairi bin Jamaludin, Ketua Pegawai Penguat Kuasa KPDNHEP Negeri Selangor serta pasukan Pegawai Penguat Kuasa KPDNHEP Selangor. Dalam masa yang sama, Pengarah Penguatkuasa KPDNHEP, Azman Adam mengetuai pemeriksaan di Kelantan. Pemeriksaan yang sama turut dijalankan di seluruh negara.

3. Pemeriksaan pertama di Selangor mensasarkan dua (2) premis pembungkusan minyak masak bersubsidi di Bandar Pinggiran Subang, Shah Alam yang merupakan premis aktif beroperasi sebagai pembekal utama bekalan minyak masak di lokaliti Shah Alam serta keseluruhan Negeri Selangor. Terdapat juga pengedaran bekalan dibuat di Kuala Lumpur

apabila ada pesanan. Pemeriksaan di Kelantan pula lebih berfokuskan untuk mengelakkan penyeludupan.

4. Pemeriksaan-pemeriksaan ini digerakkan susulan arahan YAB Perdana Menteri, Dato' Sri Ismail Sabri Yaakob hasil daripada Mesyuarat Majlis Tindakan Kos Sara Hidup Negara (NACCOL) yang memutuskan pelaksanaan operasi pengauditan dan pemutihan terhadap pengeluar dan premis pembungkus minyak masak paket yang beroperasi di seluruh Negara.

5. KPDNHEP telah merancang secara komprehensif dengan mengenal pasti premis pembungkusan minyak masak mengikut lokaliti di setiap Negeri dan melaksanakan pemeriksaan mengejut untuk meneliti status sebenar jumlah (bekalan) minyak masak paket 1 kilogram yang dikeluarkan oleh premis pengeluar dan pembungkus minyak masak bersubsidi.

6. Pemeriksaan hari ini memfokuskan kepada tempat penyimpanan bekalan, serta pemprosesan pengeluaran dan pembungkusan minyak masak paket, selain mendapatkan deklarasi atau maklumat lengkap daripada pengusaha premis yang diperiksa berkaitan minyak masak yang dikeluarkan.

7. KPDNHEP sentiasa komited dan serius dalam mengurus cabaran ketirisan bekalan minyak masak bersubsidi dan memastikan penyaluran minyak masak bersubsidi sampai kepada golongan sasaran, sekaligus dapat membantu meringankan beban kos sara hidup Keluarga Malaysia.

8. Pada masa yang sama, Pegawai Penguat Kuasa di seluruh Negara terus digerakkan secara agresif untuk memantau perlakuan tidak beretika seperti aktiviti menyorok barang kawalan khususnya minyak masak bersubsidi jenis paket 1kg demi memastikan keberadaan bekalan komoditi tersebut dan juga lain-lain barang makanan dalam lokaliti luar bandar dan pinggir bandar tidak terganggu, mencukupi dan mudah diperolehi pengguna pada harga berpatutan pada setiap masa.

9. KPDNHEP turut beri fokus pemeriksaan kedudukan harga runcit minyak masak sawit tulen dalam botol yang telah diapungkan harganya bermula 1 Julai 2022 bagi memastikan harga jualan runcit berpatutan dan peniaga tidak mengambil kesempatan dengan mengaut keuntungan secara tidak munasabah (mencatut). Mana-mana peniaga yang didapati berbuat demikian akan diberi notis di bawah Akta Kawalan Harga dan Antipencatutan 2011 dan disiasat atas kesalahan mencatut.

10. Kementerian juga akan terus memperkukuhkan kerjasama antara agensi penguatkuasaan sempadan Negara serta tindakan secara *due diligence* dengan mengadakan pengauditan di setiap rantai pengedaran barang kawalan.

11. KPDNHEP juga memberi amaran keras kepada mana-mana individu dan syarikat agar tidak terbabit/bersubahat melakukan aktiviti penyelewengan dan menyorok barang kawalan/subsidi. Mana-mana orang yang melakukan kesalahan tersebut boleh diambil tindakan di bawah Akta Kawalan Bekalan 1961 dan jika disabitkan boleh didenda tidak lebih RM1,000,000.00 (Ringgit Malaysia Satu Juta) manakala bagi kesalahan berikutnya tidak melebihi RM3,000,000.00 (Ringgit Malaysia Tiga Juta) bagi orang perseorangan atau penjara tidak melebihi tiga tahun atau kedua-

duanya sekali manakala bagi syarikat sekiranya sabit kesalahan boleh didenda tidak melebihi RM2,000,000.00 (Ringgit Malaysia Dua Juta) manakala bagi kesalahan berikutnya tidak melebihi RM5,000,000.00 (Ringgit Malaysia Lima Juta).

12. Selain itu, pihak berkaitan juga akan disiasat di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLATFPUAA 2001) (Akta 613) iaitu kesalahan pengubahan wang haram bagi tujuan mengesan, membeku, menyita serta sehingga ke peringkat perlucutan hak ke atas apa-apa hasil pendapatan atau harta yang dijana daripada aktiviti haram penyelewengan berkaitan barangan kawalan/subsidi.

13. Jika disabitkan dengan kesalahan di bawah Akta 613 ini boleh dipenjarakan selama tempoh tidak melebihi lima belas (15) tahun dan juga boleh didenda tidak kurang daripada lima kali ganda jumlah atau nilai hasil daripada aktiviti haram atau peralatan kesalahan itu pada masa kesalahan itu dilakukan atau lima juta ringgit yang mana yang lebih tinggi.

14. Anggota penguat kuasa KPDNHEP akan sentiasa berada di lokasi-lokasi yang menjadi tumpuan orang ramai membeli-belah seperti pasar awam, pasar tani dan pasaraya untuk menjalankan pemeriksaan dan pemantauan.

15. Selain itu, bagi memastikan setiap aduan yang diterima daripada pengguna dapat diuruskan dengan lebih berkesan, KPDNHEP telah mengaktifkan Pusat Arahan Penguatkuasaan (ECC) yang akan beroperasi setiap hari termasuk cuti hujung minggu bermula jam 8.00 pagi hingga 8.00

malam. Mengikut statistik aduan sebanyak 22 aduan berkaitan minyak masak dan 25 aduan berkaitan ayam dalam tempoh 1 hingga 4 Julai 2022.

16. Pengguna yang mempunyai sebarang maklumat berkaitan salah laku peniaga berhubung barang kawalan bersubsidi khususnya minyak masak paket 1kg boleh menyalurkan aduan lengkap kepada KPDNHEP melalui saluran berikut:

- i. WhatsApp 019-279 4317 / 019-848 8000
- ii. Portal Aduan; e-aduan.kpdnhep.gov.my
- iii. Call Centre 1-800-886-800
- iv. Emel e-aduan@kpdnhep.gov.my
- v. Ez ADU KPDNHEP

DATO' ROSOL BIN WAHID

Timbalan Menteri

Kementerian Perdagangan Dalam Negeri
Dan Hal Ehwal Pengguna

5 Julai 2022